

Disposición derradeira primeira. *Habilitación.*

Autorízase o ministro de Economía e Facenda para dítar, por proposta do Consello Reitor, as disposicións necesarias en desenvolvemento e execución deste real decreto, así como para modificar os límites cuantitativos previstos nos artigos 8.1.a), 8.1.b) e 8.1.c), e 13, parágrafo terceiro, do Real decreto 568/1988, do 6 de maio, cando as circunstancias o aconsellen.

Disposición derradeira segunda. *Entrada en vigor.*

O presente real decreto entrará en vigor o día 1 de xaneiro de 2007.

Dado en Madrid o 9 de febreiro de 2007.

JUAN CARLOS R.

O vicepresidente segundo do Goberno
e ministro de Economía e Facenda,
PEDRO SOLBES MIRA

MINISTERIO DA PRESIDENCIA

3941 REAL DECRETO 278/2007, do 23 de febreiro, sobre bonificacións na cotización á Seguridade Social respecto do persoal investigador. («BOE» 48, do 24-2-2007.)

A disposición adicional vixésima da Lei 35/2006, do 28 de novembro, do imposto sobre a renda das persoas físicas e de modificación parcial das leis dos impostos sobre sociedades, sobre a renda de non-residentes e sobre o patrimonio, autoriza o Goberno para que estableza bonificacións nas cotizacións á Seguridade Social correspondentes ao persoal investigador que, con carácter exclusivo, se dedique a actividades de investigación e desenvolvemento e innovación tecnolóxica, a que se refire o artigo 35 do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo.

A citada Lei 35/2006 modifica o réxime normativo dos incentivos á investigación e o desenvolvemento e innovación tecnolóxica ao cambiar, por un lado, a dedución polas actividades existente na actualidade no imposto sobre sociedades e, por outro, incorporar un novo incentivo de natureza non tributaria incompatible co anterior, consistente na bonificación na cotización á Seguridade Social e que é obxecto de desenvolvemento con este real decreto.

Este novo incentivo á investigación demostrou un bo funcionamento noutros países da Unión Europea en que xa se está aplicando e, ademais, presenta outras vantaxes fronte ao incentivo de natureza tributaria, xa que ten un efecto máis directo e favorece a realización da actividade e a contratación de traballadores en España.

Este real decreto desenvolve o réxime normativo das novas bonificacións nas cotizacións á Seguridade Social, regulando o obxecto, o ámbito de aplicación, as excepcións, os requisitos dos beneficiarios, o réxime de incompatibilidades, o procedemento de opción, a identificación do persoal ante a Seguridade Social, a aplicación, control e mantemento das bonificacións, o reintegro dos beneficios en caso de incumprimento dos requisitos e o financiamento. Así mesmo, o texto normativo inclúe unha disposición adicional, unha transitoria e dúas derradeiras.

Na súa virtude, por proposta do vicepresidente segundo do Goberno e ministro de Economía e Facenda e dos ministros de Traballo e Asuntos Sociais e de Industria, Turismo e Comercio, de acordo co Consello de Estado e logo de deliberación do Consello de Ministros na súa reunión do día 23 de febreiro de 2007,

DISPONGO:

Artigo 1. *Obxecto.*

Este real decreto ten por obxecto o establecemento dunha bonificación do 40 por cento nas achegas empresariais ás cotas da Seguridade Social por contingencias comúns respecto do persoal investigador que se determina no artigo 2, así como a regulación do exercicio da opción pola aplicación desa bonificación por parte das empresas dedicadas a actividades de investigación e desenvolvemento e innovación tecnolóxica, a que se refire o artigo 35 do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo.

Artigo 2. *Ámbito de aplicación.*

1. A bonificación establecida por este real decreto poderase aplicar na cotización relativa aos traballadores incluídos nos grupos 1, 2, 3 e 4 de cotización ao réxime xeral da Seguridade Social que, con carácter exclusivo e pola totalidade do seu tempo de traballo na empresa dedicada a actividades de investigación e desenvolvemento e innovación tecnolóxica, se dediquen á realización das citadas actividades, xa sexa o seu contrato de carácter indefinido, en prácticas, ou de carácter temporal por obra ou servizo determinado. Neste último caso, o contrato deberá ter unha duración mínima de tres meses.

2. Para efectos do establecido neste real decreto, considerarase investigación a indagación orixinal planificada que persiga descubrir novos coñecementos e unha comprensión superior no ámbito científico e tecnolóxico, e desenvolvemento á aplicación dos resultados da investigación ou de calquera outro tipo de coñecemento científico para a fabricación de novos materiais ou produtos ou para o deseño de novos procesos ou sistemas de produción, así como para a mellora tecnolóxica substancial de materiais, produtos, procesos ou sistemas preexistentes.

Considérase tamén actividade de investigación e desenvolvemento a materialización dos novos produtos ou procesos nun plano, esquema ou deseño, así como a creación dun primeiro prototipo non comercializable e os proxectos de demostración inicial ou proxectos piloto, sempre que estes non se poidan converter ou utilizar para aplicacións industriais ou para a súa explotación comercial.

Así mesmo, considerarase actividade de investigación e desenvolvemento o deseño e elaboración do mostrario para o lanzamento de novos produtos. Para estes efectos, entenderase como lanzamento dun novo produto a súa introdución no mercado, e como novo produto, aquel cuxa novidade sexa esencial e non simplemente formal ou accidental.

Tamén se considerará actividade de investigación e desenvolvemento a concepción de software avanzado, sempre que supoña un progreso científico ou tecnolóxico significativo mediante o desenvolvemento de novos teoremas e algoritmos ou mediante a creación de sistemas operativos e linguaxes novas, ou sempre que estea destinado a lles facilitar ás persoas discapacitadas o acceso aos servizos da sociedade da información. Non se inclúen as actividades habituais ou rutineiras relacionadas co software.

3. Para efectos do establecido neste real decreto, considerarase innovación tecnolóxica a actividade cuxo resultado sexa un avance tecnolóxico na obtención de novos produtos ou procesos de produción ou melloras substanciais dos xa existentes. Consideraranse novos aqueles produtos ou procesos cuxas características ou aplicacións, desde o punto de vista tecnolóxico, difiran substancialmente das existentes con anterioridade.

Esta actividade incluírá a materialización dos novos produtos ou procesos nun plano, esquema ou deseño, a creación dun primeiro prototipo non comercializable, os proxectos de demostración inicial ou proxectos piloto e os mostrarios téxtiles, sempre que non se poidan converter ou utilizar para aplicacións industriais ou para a súa explotación comercial.

Tamén se inclúen as actividades de diagnóstico tecnolóxico tendentes á identificación, a definición e a orientación de solucións tecnolóxicas avanzadas realizadas por centros de innovación e tecnoloxía, recoñecidos e rexistrados como tales segundo o Real decreto 2609/1996, do 20 de decembro, polo que se regulan os centros de innovación e tecnoloxía, con independencia dos resultados en que culminen.

Artigo 3. *Exclusións.*

O réxime de bonificacións regulado neste real decreto non será de aplicación nos seguintes supostos:

a) Respecto daqueles empregados que destinen unicamente parte da súa xornada laboral á realización de actividades de investigación, de desenvolvemento ou de innovación tecnolóxica.

b) Respecto daqueles empregados que traballen para empresas que levan a cabo proxectos de investigación, de desenvolvemento ou de innovación tecnolóxica, cuxo labor consista en actividades distintas ás sinaladas no artigo segundo, como son as de administración, xestión de recursos, mercadotecnia, servizos xerais e dirección, entre outras.

c) Respecto daqueles empregados contratados pola Administración xeral do Estado e os organismos regulados no título III e nas disposicións adicionais novena e décima da Lei 6/1997, do 14 de abril, de organización e funcionamento da Administración xeral do Estado, as administracións autonómicas ou as corporacións locais e os seus organismos públicos, así como por outros entes públicos que estean totalmente exentos do imposto sobre sociedades.

d) Relacións laborais de carácter especial previstas no artigo 2 do texto refundido da Lei do Estatuto dos traballadores, aprobado polo Real decreto legislativo 1/1995, do 24 de marzo, ou outras disposicións legais.

e) Respecto do persoal contratado por empresas ou organismos cuxa contratación para actividades de investigación e desenvolvemento e innovación tecnolóxica estea explicitamente subvencionada ou financiada con fondos públicos, sempre que o dito financiamento inclúa tamén as cotas empresariais á Seguridade Social.

Artigo 4. *Requisitos dos beneficiarios.*

Os beneficiarios das bonificacións previstas neste real decreto deberán reunir os seguintes requisitos:

a) Estar ao día no cumprimento das súas obrigas tributarias e de Seguridade Social. Se durante o período de bonificación existe unha falta de ingreso en prazo regulamentario das ditas obrigas, producirase a perda automática das bonificacións respecto das cotas correspondentes a períodos en que as citadas obrigas non fosen ingresadas no dito prazo.

b) Non ter sido excluídos do acceso aos beneficios derivados da aplicación dos programas de emprego pola comisión de infraccións moi graves non prescritas, todo iso de conformidade co previsto no artigo 46.2 do texto refundido da Lei sobre infraccións e sancións na orde social, aprobado polo Real decreto legislativo 5/2000, do 4 de agosto.

Artigo 5. *Concorrenza, contía máxima e incompatibilidade das bonificacións.*

1. As bonificacións aquí previstas poderán ser compatibles con aquelas a que se puidese acceder ou estar desfrutando por aplicación do Programa de Fomento de Emprego, sen que en ningún caso a suma das bonificacións aplicables poida superar o cen por cento da cota empresarial á Seguridade Social.

Así mesmo non poderán, en concorrencia con outras medidas de apoio público establecidas para a mesma finalidade, superar o 60 por cento do custo salarial anual correspondente ao contrato que se bonifica.

2. O exercicio da opción a que se refire o artigo seguinte será incompatible coa aplicación do réxime de dedución por actividades de investigación e desenvolvemento e innovación tecnolóxica establecido no artigo 35 do texto refundido da Lei do imposto de sociedades, aprobado polo Real decreto legislativo 4/2004, do 5 de marzo.

Artigo 6. *Exercicio da opción polas bonificacións na cotización á Seguridade Social respecto do persoal investigador.*

1. De acordo co establecido na disposición adicional vixésima da Lei 35/2006, do 28 de novembro, do imposto sobre a renda das persoas físicas e de modificación parcial das leis dos impostos sobre sociedades, sobre a renda de non-residentes e sobre o patrimonio, os suxeitos pasivos ou contribuíntes poderán optar por aplicar unha bonificación na cotización á Seguridade Social respecto do persoal que con carácter exclusivo se dedique a actividades de investigación e desenvolvemento e innovación tecnolóxica, sempre que, ao mesmo tempo, non estean aplicando o réxime de dedución polas ditas actividades a que se refire o artigo 35 do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo.

2. O exercicio da opción deberase realizar mediante unha comunicación dirixida á Administración tributaria, que se efectuará no penúltimo mes anterior ao inicio do período impositivo en que deba producir efecto, entendéndose prorrogada tacitamente nos períodos impositivos sucesivos, salvo que o suxeito pasivo ou contribuínte renuncie a ela. O exercicio da dita opción será condición necesaria para a aplicación da bonificación das cotizacións da Seguridade Social mencionadas no punto anterior e terá o carácter de irrevogable para o período impositivo en que deba producir efecto.

Tratándose de grupos fiscais que optasen polo réxime tributario previsto no capítulo VII do título VII do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo, a opción prevista no parágrafo anterior, así como, de ser o caso, a correspondente renuncia, deberá ser exercida mediante a oportuna comunicación pola sociedade dominante e vinculará todas as sociedades integrantes do grupo fiscal.

3. A renuncia deberase efectuar mediante comunicación á Administración tributaria no penúltimo mes anterior ao período impositivo en que deba producir efecto.

4. Tanto o exercicio da opción como a renuncia ante a Administración tributaria deberanse efectuar por medios telemáticos.

Artigo 7. *Comunicación da opción e das bonificacións practicadas.*

1. A Axencia Estatal de Administración Tributaria facilitaralle á Tesouraría Xeral da Seguridade Social, polo procedemento informático que oportunamente acorden, a relación de empresas que optaron pola aplicación das bonificacións na cotización á Seguridade Social por reunir os requisitos establecidos neste real decreto. Así mesmo, facilitará a relación de empresas que tendo optado pola aplicación das bonificacións na cotización á Seguridade Social modifiquen posteriormente a súa opción e deixen de aplicalas.

En ambos os casos, a Axencia Estatal de Administración Tributaria informará da data de efectos das opcións realizadas polos empresarios.

2. A Tesouraría Xeral da Seguridade Social remitirá ao Servizo Público de Emprego Estatal, con carácter mensual, información sobre as bonificacións practicadas, detallando o número de traballadores obxecto de bonificacións, coas súas respectivas bases de cotización e as deducións aplicadas como consecuencia do previsto nesta norma.

Artigo 8. *Identificación do persoal investigador ante a Tesouraría Xeral da Seguridade Social.*

As empresas que opten pola bonificación na cotización á Seguridade Social deben identificar ante a Tesouraría Xeral da Seguridade Social aqueles traballadores respecto dos cales se pretende aplicar as bonificacións por se dedicar, con carácter exclusivo, a actividades de investigación e desenvolvemento e innovación tecnolóxica, conforme o establecido no artigo 2 deste real decreto.

A identificación efectuarase:

a) No caso de traballadores que xa figuren en situación de alta na empresa na data de efectos da opción pola aplicación das bonificacións na cotización, como solicitude de variación de datos que se deberá presentar no prazo establecido no artigo 32.3.2.º do Regulamento xeral sobre inscrición de empresas e afiliación, altas, baixas e variacións de datos de traballadores na Seguridade Social, aprobado polo Real decreto 84/1996, do 26 de xaneiro.

b) No caso de traballadores que causen alta a partir da data de efectos da opción pola aplicación das bonificacións na cotización, na solicitude de alta do respectivo traballador, dentro do prazo establecido no artigo 32.3.1.º do Regulamento xeral antes citado.

Artigo 9. *Aplicación e control das bonificacións.*

1. As bonificacións aplicaranas as empresas beneficiarias, unha vez cumprido o requisito previo de opción por esta medida, con carácter automático nos correspondentes documentos de cotización, sen prexuízo do seu control e revisión pola Inspección de Traballo e Seguridade Social, pola Tesouraría Xeral da Seguridade Social e polo Servizo Público de Emprego Estatal.

2. Para efectos de aplicación e control, as empresas poderanlle presentar ao órgano e aos organismos sinalados no punto anterior informe motivado emitido polo Ministerio de Industria, Turismo e Comercio, ou por un organismo adscrito a este, nos termos que establece o Real decreto 1432/2003, do 21 de novembro, polo que se regula a emisión de informes motivados relativos ao cumprimento de requisitos científicos e tecnolóxicos,

para efectos da aplicación e interpretación de deducións fiscais por actividades de investigación e desenvolvemento e innovación tecnolóxica, segundo o establecido na disposición adicional única deste real decreto.

Os informes motivados citados anteriormente vincularán a Administración.

Artigo 10. *Mantemento de bonificacións.*

En caso de sucesión de empresas, en virtude do establecido no artigo 44 do texto refundido da Lei do Estatuto dos traballadores, aprobado polo Real decreto legislativo 1/1995, do 24 de marzo, o novo empregador non perderá o dereito ás bonificacións desfrutadas polo anterior, se o persoal investigador continúa desenvolvendo actividades de investigación, desenvolvemento e innovación e o novo empregador exerce a opción de aplicar as bonificacións reguladas neste real decreto.

Artigo 11. *Reintegro dos beneficios.*

1. Nos supostos de obtención das bonificacións sen reunir os requisitos exixidos, procederá a devolución das cantidades deixadas de ingresar por bonificación na cotización á Seguridade Social coa recarga e os xuros de demora correspondentes, segundo o establecido nas normas recatorias en materia de Seguridade Social.

2. A obriga de reintegro establecida no parágrafo anterior enténdese sen prexuízo do previsto no texto refundido da Lei sobre infraccións e sancións na orde social, aprobado polo Real decreto legislativo 5/2000, do 4 de agosto.

Artigo 12. *Financiamento.*

No orzamento do Estado habilitaranse os créditos necesarios para a compensación ao Servizo Público de Emprego Estatal, do custo liquidado en cada exercicio pola bonificación na cotización á Seguridade Social establecida neste real decreto.

Disposición adicional única. *Modificación do Real decreto 1432/2003, do 21 de novembro, polo que se regula a emisión de informes motivados relativos ao cumprimento de requisitos científicos e tecnolóxicos, para efectos da aplicación e interpretación de deducións fiscais por actividades de investigación e desenvolvemento e innovación tecnolóxica.*

Introdúcense as seguintes modificacións no Real decreto 1432/2003, do 21 de novembro:

Un. O artigo 1 queda redactado do seguinte modo:

«Artigo 1. *Obxecto.*

Este real decreto ten por obxecto a regulación do procedemento de emisión por parte do Ministerio de Industria, Turismo e Comercio, ou organismo adscrito a este, dos informes motivados de carácter vinculante relativos ao cumprimento dos requisitos científicos e tecnolóxicos, para os efectos da aplicación e interpretación da dedución por actividades de investigación e desenvolvemento e innovación tecnolóxica, prevista no artigo 35 do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo, así como para efectos de aplicación das bonificacións na cotización á Seguridade Social respecto do persoal investigador, previstas na disposición adicional vixésima da Lei 35/2006, do 28 de novembro, do imposto sobre a renda das persoas físicas e de modificación parcial das leis dos impostos sobre sociedades, sobre a renda de non-residentes e sobre o patrimonio.»

Dous. Engádeselle ao artigo 2 unha nova alínea d) co seguinte contido:

«d) Informe motivado, relativo ao cumprimento dos requisitos científicos e tecnolóxicos do persoal investigador, para os efectos de aplicar as correspondentes bonificacións na cotización á Seguridade Social que regula a disposición adicional vixésima da Lei 35/2006, do 28 de novembro, do imposto sobre a renda das persoas físicas e de modificación parcial das leis dos impostos sobre sociedades, sobre a renda de non-residentes e sobre o patrimonio.»

Tres. O último parágrafo do artigo 2 queda redactado do seguinte modo:

«Os informes motivados referentes ás deducións do imposto sobre sociedades regulados neste real decreto poderán ser emitidos sobre as actividades e os gastos e investimentos asociados a elas que sexan presentadas no marco dun proxecto individualizado.»

O informe motivado a que se refire a alínea d) deste artigo limitarase a acreditar que o solicitante ten persoal, de nova contratación ou xa pertencente á empresa, dedicado de maneira exclusiva e pola totalidade do seu tempo de traballo a actividades de investigación e desenvolvemento e innovación tecnolóxica.»

Catro. O punto primeiro do artigo 3 queda redactado do seguinte modo:

«1. Poderán solicitar os informes motivados os suxeitos pasivos que queiran practicar a dedución fiscal por actividades de investigación e desenvolvemento e innovación tecnolóxica prevista no artigo 35 do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo, e, de ser o caso, para ser achegados ás consultas vinculantes e aos acordos previos de valoración previstos na lexislación vixente.»

Así mesmo, poderanse solicitar informes motivados para efectos da aplicación das bonificacións na cotización á Seguridade Social respecto do persoal investigador segundo establece a alínea d) do artigo 2.»

Cinco. O punto terceiro do artigo 5 queda redactado do seguinte modo:

«3. Igualmente, salvo nos supostos e nos termos que se establezan por orde do ministro de Industria, Turismo e Comercio, o solicitante deberá presentar un informe técnico de cualificación das actividades e identificación dos gastos e investimentos asociados a investigación e desenvolvemento ou innovación, de acordo coas definicións destes conceptos e os requisitos científicos e tecnolóxicos previstos no artigo 35 do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo, emitido por unha entidade debidamente acreditada pola Entidade Nacional de Acreditación (ENAC).»

Seis. Engádeselle ao artigo 5 un novo punto quinto co seguinte contido:

«5. Para efectos de aplicación das bonificacións na cotización á Seguridade Social respecto do persoal investigador, as solicitudes presentaranse mediante escrito asinado dirixido ao órgano competente, de acordo co formulario normalizado que se aprobará por orde do ministro de Industria, Turismo e Comercio e que estará dispoñible na sede electrón-

ica do Ministerio de Industria, Turismo e Comercio (www.mityc.es).

As solicitudes deberáselles xuntar un informe técnico de acreditación do persoal investigador, e será de aplicación o previsto no punto 3 deste artigo.»

Sete. O punto primeiro do artigo 8 queda redactado do seguinte modo:

«1. O órgano competente emitirá informe motivado sobre cada solicitude presentada, separando, de ser o caso, os seus contidos en investigación e desenvolvemento, de conformidade co disposto no artigo 35.1.a) do texto refundido da Lei do imposto sobre sociedades, aprobado polo Real decreto legislativo 4/2004, do 5 de marzo, ou en innovación tecnolóxica, de acordo co previsto no artigo 35.2.a) da mesma lei. No caso dos informes motivados a que se refiren as alíneas a) e c) do artigo 2 deste real decreto, detallarase a identificación dos gastos e investimentos asociados con cada contido que merezan tales cualificacións.»

O informe motivado notificarallo ao interesado o órgano competente, e remitiráselle copia á Administración tributaria.

No caso do informe a que se refire a alínea d) do artigo 2 para efectos de aplicación das bonificacións na cotización á Seguridade Social respecto do persoal investigador emitirase informe motivado indicando o nome, cargo e titulación das persoas da empresa dedicadas exclusivamente e pola totalidade do seu tempo de traballo á realización de actividades de investigación e desenvolvemento e innovación tecnolóxica.»

Disposición transitoria única. Exercicio da opción pola bonificación na cotización á Seguridade Social respecto do persoal investigador, para os suxeitos pasivos ou contribuíntes cuxos períodos impositivos se inicien entre o 1 de xaneiro e o 31 de maio de 2007.

1. Os suxeitos pasivos ou contribuíntes que desexen optar pola bonificación regulada neste real decreto, para os períodos impositivos iniciados entre o 1 de xaneiro e o 31 de maio de 2007, disporán para exercer esta opción desde o día seguinte á data da súa publicación no «Boletín Oficial del Estado» ata o 30 de abril de 2007.

2. Exercida a opción, a bonificación poderase aplicar a todas as cotizacións correspondentes ao período impositivo a que se refire a dita opción, sempre que se cumprise o requisito de identificación establecido no artigo 8 deste real decreto.

Se se satisfixesen cotas ás cales resulte de aplicación a bonificación, sen podela practicar como consecuencia do ingreso daquelas con anterioridade á data da opción a que refire o punto 1, poderase solicitar da Tesouraría Xeral da Seguridade Social a devolución da parte das cotas obxecto da bonificación.

Disposición derradeira primeira. Facultades de aplicación e desenvolvemento.

Facúltanse os ministros de Economía e Facenda, de traballo e Asuntos Sociais e de Industria, Turismo e Comercio, nos seus respectivos ámbitos de competencia, para ditar as disposicións que sexan necesarias para a aplicación e desenvolvemento do establecido neste real decreto.

Disposición derradeira segunda. *Entrada en vigor.*

Este real decreto entrará en vigor o mesmo día da súa publicación no «Boletín Oficial del Estado».

Dado en Madrid o 23 de febreiro de 2007.

JUAN CARLOS R.

A vicepresidenta primeira do Goberno
e ministra da Presidencia,

MARÍA TERESA FERNÁNDEZ DE LA VEGA SANZ

MINISTERIO DE SANIDADE E CONSUMO

4063 *ORDE SCO/401/2007, do 20 de febreiro, pola que se modifica o anexo do Real decreto 2107/1996, do 20 de setembro, polo que se establecen as normas de identidade e pureza dos colorantes utilizados nos produtos alimenticios. («BOE» 50, do 27-2-2007.)*

O Real decreto 2107/1996, do 20 de setembro, polo que se establecen as normas de identidade e pureza dos colorantes utilizados nos produtos alimenticios, determina, na parte B do seu anexo, os criterios específicos de pureza aplicables aos colorantes utilizados nos produtos alimentarios. Este real decreto incorporou ao noso ordenamento xurídico interno a Directiva 95/45/CE da Comisión, do 26 de xullo de 1995, pola que se establecen os criterios específicos de pureza en relación cos colorantes utilizados nos produtos alimenticios.

De conformidade coa súa disposición derradeira primeira, o anexo do Real decreto 2107/1996, do 20 de setembro, foi sucesivamente actualizado para adecualo ás modificacións derivadas da actualización técnica das normas comunitarias, en última ocasión mediante a Orde SCO/4223/2004, do 16 de decembro, pola que se modifica o anexo da Orde SCO/1052/2002, do 7 de maio, pola que se modifica o anexo do Real decreto 2107/1996, do 20 de setembro.

A Directiva 2006/33/CE da Comisión, do 20 de marzo de 2006, pola que se modifica a Directiva 95/45/CE no relativo aos colorantes amarelo alaranxado S (E 110) e dióxido de titanio (E 171), establece novos criterios específicos de pureza para estes dous colorantes.

Polo que respecta ao amarelo alaranxado S (E 110), limitase a presenza do colorante Sudan I (como impureza) en cantidades inferiores ao límite de cuantificación, é dicir, a 0,50 mg/kg, debido a que cientificamente se demostrou que durante a produción do amarelo alaranxado S se pode formar, como impureza, a substancia Sudan I, colorante non autorizado e cuxa presenza non é desexable nos alimentos.

Tamén se modifica o límite ata agora fixado para o chumbo no colorante amarelo alaranxado S (E 110), tendo en conta as especificacións e técnicas de análise para aditivos que preparou o Comité Mixto FAO/OMS de Expertos en Aditivos Alimentarios (JECFA) e o programa sistemático de substitución da proba de detección de metais pesados en todas as especificacións sobre aditivos alimentarios existentes, por límites adecuados a cada un dos metais, que o JECFA xa empezou a aplicar.

En canto ao dióxido de titanio (E 171), modifícanse os criterios de pureza para autorizar a elaboración deste

colorante en forma de plaquiñas de rútilo, xa que o seu uso non presenta problemas de seguridade e ten interese tecnolóxico como colorante para alimentos e para películas de recubrimento de complementos alimenticios.

Por outra parte, a corrección de erros da Directiva 95/45/CE da Comisión, do 26 de xullo de 1995, publicada no *Diario Oficial de la Unión Europea* n.º L 135, do 3 de xuño de 2003, determina a necesidade de corrixir os criterios específicos de pureza do colorante azul patente V (E 131) en canto ao pH requirido para a determinación e identificación por espectrofotometría vis-UV.

Mediante esta disposición incorpórase ao ordenamento xurídico interno a Directiva 2006/33/CE da Comisión, do 20 de marzo de 2006, e recóllese a corrección de erros da Directiva 95/45/CE da Comisión, do 26 de xullo de 1995.

Na súa tramitación foron oídos os sectores afectados e emitiu informe preceptivo a Comisión Interministerial para a Ordenación Alimentaria.

Esta orde dítase de conformidade co establecido na disposición derradeira primeira do Real decreto 2107/1996, do 20 de setembro.

Na súa virtude, de acordo co ditame do Consello de Estado, dispoño:

Artigo único. Modificación do anexo do Real decreto 2107/1996, do 20 de setembro, polo que se establecen as normas de identidade e pureza dos colorantes utilizados nos produtos alimenticios.

Na parte B do anexo do Real decreto 2107/1996, do 20 de setembro, polo que se establecen as normas de identidade e pureza dos colorantes utilizados nos produtos alimenticios, substitúense os criterios específicos de pureza dos aditivos colorantes amarelo alaranxado S (E 110), dióxido de titanio (E 171) e azul patente V (E 131), polos establecidos no anexo desta orde.

Disposición transitoria única. Prórroga de fabricación, importación e comercialización.

1. Ata o 10 de abril de 2007 permítese a fabricación e importación de amarelo alaranxado S (E 110) e dióxido de titanio (E 171) que, non axustándose aos criterios específicos de pureza dispostos nesta orde, cumpran coa normativa vixente antes da súa entrada en vigor.

2. Os colorantes amarelo alaranxado S (E 110) e dióxido de titanio (E 171) postos á venda ou etiquetados antes do 10 de abril de 2007, que non se axusten ao dispostos nesta orde, poderán seguir comercializándose ata o esgotamento de existencias, sempre que cumpran coa normativa vixente antes da súa entrada en vigor.

Disposición derradeira primeira. Incorporación de dereito da Unión Europea.

Mediante esta disposición incorpórase ao ordenamento xurídico interno a Directiva 2006/33/CE da Comisión, do 20 de marzo de 2006, pola que se modifica a Directiva 95/45/CE no relativo aos colorantes amarelo alaranxado S (E 110) e dióxido de titanio (E 171).

Disposición derradeira segunda. *Entrada en vigor.*

Esta orde entrará en vigor o día seguinte ao da súa publicación no *Boletín Oficial del Estado*.

Madrid, 20 de febreiro de 2007.—A ministra de Sanidade e Consumo, Elena Salgado Méndez.